

Saksbehandlar: Joakim Systaddal, Plan og samfunn
Sak nr.: 21/1372-5

Kommunal tilskot kompensasjonsordning til lokale verksemder- jf. Prop 79S

Rådmannen rår formannskapet til å gjere slikt vedtak:

1. Formannskapet godkjenner «Retningslinjer for kommunalt næringsfond 2021 i Sogndal kommune» slik dei ligg føre.
2. Midlane skal lysast ut med ein gang, og søkast fordelt etter fylgjande nøkkel:
 - a. 60% til verksemder heimehøyrande i Sogndal kommune innan dei næringane som er prioriterte i retningslinjene
 - b. 20% til prosjekt med regionalt nedslagsfelt og med prosjekteigarar frå minst to kommunar
 - c. 20% til mobilisering til utviklingstiltak og fellesprosjekt (kurs, opplæring, tilrettelegging, forstudie osv.)
3. Det vert gjevne fylgjande fullmakter:
 - a. Inntil 200.000 delegert til administrasjonen i Sogndal kommune.
 - b. Søknadsbeløp over 200.000 delegert til formannskapet.

Vedlegg:

1. Retningslinjer for kommunalt næringsfond 2021

Andre dokument:

1. Kommunestyresak 82/2020
2. Retningslinjer for kommunalt næringsfond i Sogndal kommune 2020

SAKSFRAMSTILLING

1. Bakgrunn for saka

Kommunal- og moderniseringsdepartementet har i brev av 25/2 gjeve melding om at det er løyvd midlar til kommunale næringsfond som eit tiltak mot koronakrisa. Sogndal kommune fekk tildelt kr. 1.095.748,-. Det er utarbeidd sentrale føringar for tildelingskriterier og lovheimel for å gje tilskott som kommunane pliktar å fylgje.

2. Vurderingar og konsekvensar

Fondet vert gjeve med mange av dei same vilkåra og måla som førre tildeling frå juni 2020, med ei tilleggspresisering om at verksemdar som har falle heilt eller delvis utanfor dei andre kompensasjonsordningane frå stat og kommune skal prioriterast. Næringslivet i Sogndal er særleg eksponert for koronakrisa innan reiseliv, men også kulturnæringane og andre enkeltbedrifter som har ei verksemd som krev mange menneske samla har vore råka over lang tid. Difor vil desse bransjane vere særleg prioritert i tildelingane, men alle prosjekt med høg sysselsettingsgrad vil bli vurdert som relevante til å motverke effekten av koronapandemien.

Det er viktig for den framtidige aktiviteten i regionen at det vert jobba målretta med omstilling og fornying av produkt og tenester. Tilskotet skal så langt som råd bidra til at næringslivet kan gjennomføre prosjekt som med bidrag frå fondet gjer at bedriftene er betre rigga for framtida etter gjennomført prosjekt. I tilfelle der levedyktige verksemdar treng kortsiktig hjelp til å oppretthalde sysselsetting og aktivitet kan krava fråvikast i spesielt viktige saker.

Retningslinjene for tildelinga er bygd på retningslinjene frå førre runde, med nokre justeringar og presiseringar i samsvar med tilskotsbrevet frå KMD. Forvaltninga av fondsmidlane som vart gjevne i 2021 fungerte godt, og det vert difor lagt opp til tilsvarande praksis i denne runda.

Formannskapet må ta stilling til om formannskapet sjølv kan gjere vedtak i saka. Dette med bakgrunn i at kommunestyret ikkje har møte før i mai, og det er føresett at kommunane nyttar midlane i tråd med intensjonen så raskt som råd. Administrasjonen heller til at retningslinjene i denne omgang kan bli vedtekne av formannskapet. Dette må bli grunngjevne med at retningslinjene i all hovudsak er like retningslinjene vedteke av kommunestyret ved førre tildeling, og at saka såleis no ikkje er av prinsipiell karakter. Vedtak av retningslinjene får heller ingen budsjettmessig konsekvens. Saka ligg elles innafor formannskapet sitt ansvarsområde etter delegeringsreglementet med at «*Formannskapet skal ha særleg fokus på samfunns- og næringsutvikling*».

3. Konklusjon

Sogndal kommune har gjennom førre runde vist at ein har god kapasitet og evne til å forvalte fondsmidlane i samsvar med retningslinjer og intensjon. Sogn Næring lyser ut og handsamar søknadane, og gjev administrative vedtak saman med administrasjonen i Sogndal kommune. Dette har sytt for rask handsaming og god rettleiing for søkarar, slik at midlane kjem raskt til nytte i gode prosjekt. Det vert difor lagt opp til å gjennomføre fondsforvaltninga på same måte i denne runda, med mindre justeringar i retningslinjene for å sikre samsvar med tilskotsbrevet for den nye løyvinga.